



Na osnovu člana 17. stav (2) i člana 44. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine”, br. 25/04, 93/05, 48/07, 15/08, 63/23, 9/24 i 50/24), a u vezi sa članom 20. stav (1) Zakona o suzbijanju korupcije i organiziranog kriminala u Federaciji Bosne i Hercegovine („Službene novine Federacije BiH“ broj 59/14) i članom 61b. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24, 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sudija Halil Lagumdžija, predsjednik Vijeća, sutkinja Aleksandra Obradović i sutkinja Sanela Gorušanić - Butigan, potpredsjednice Vijeća, tužiteljica Bojana Jolović, sudija mr. Srđan Forca, sudija Mustafa Šabić, advokat dr. sc Davor Martinović, advokatica mr. Duška Bogojević, prof. dr. Džamna Vranić, tužiteljica Snježana Petković, tužilac Saša Sarajlić i tužiteljica Željka Fabić, na sjednici održanoj 15. i 16.01.2025. godine, donijelo je

R J E Š E N J E

o imenovanju tužioca i posebnog zamjenika glavnog federalnog tužioca za suzbijanje korupcije, organiziranog i međukantonalnog kriminala Federalnog tužilaštva Federacije Bosne i Hercegovine

- I. Za poziciju tužioca i posebnog zamjenika glavnog federalnog tužioca za suzbijanje korupcije, organiziranog i međukantonalnog kriminala Federalnog tužilaštva Federacije Bosne i Hercegovine imenuje se **Hrvoje Čabrajić**.
- II. Imenovani se na poziciju posebnog zamjenika glavnog federalnog tužioca imenuje na mandat od šest (6) godina.
- III. Datum stupanja na dužnost imenovanog Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 04.11.2024. godine objavilo javni konkurs pod brojem: 04-07-3-3969-1/2024, kojim je oglašena pozicija posebnog zamjenika glavnog federalnog tužioca Federalnog tužilaštva Federacije Bosne i Hercegovine, Poseban odjel Federalnog tužilaštva Federacije Bosne i Hercegovine za suzbijanje korupcije, organiziranog i međukantonalnog kriminala - iskustvo u radu na predmetima organizovanog kriminala i korupcije odnosno složenim krivičnim predmetima.

Nakon provedene konkursne procedure, nadležno podvijeće je u skladu sa članom 61b. stav. (1) Poslovnika VSTV-a BiH za posebnog zamjenika glavnog federalnog tužioca za suzbijanje korupcije, organiziranog i međukantonalnog kriminala Federalnog tužilaštva Federacije Bosne i Hercegovine (u daljem tekstu: posebni zamjenik glavnog federalnog tužioca), predložilo kandidate na rang listi pod rednim brojem 1, 2 i 3 sa liste uspješnih kandidata, i to Pavu Radoša, Samira Selimovića i Hrvoja Čabrajića, koji na sjednici Vijeća izlažu program rada koji su ranije dostavili i izložili komisiji za obavljanje razgovora.

U skladu sa članom 61b. st. (3), (4) i (5) Poslovnika VSTV-a BiH, nadležno podvijeće dostavilo je Vijeću obrazložene prijedloge za sva tri kandidata sa rang liste pod rednim br. 1, 2 i 3, sa bodovima koje su

kandidati ostvarili u konkursnoj proceduri i njihovim programom rada, te rang listu i mišljenja u vezi sa radnim iskustvom i rezultatima kandidata.

Nakon izlaganja prijedloga podvijeća, sva tri predložena kandidata su na sjednici Vijeća, u skladu sa članom 61b. st. (6) i (7) Poslovnika VSTV-a BiH, izložili svoj program rada, prema redoslijedu koji su ostvarili na rang listi.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovníkom VSTV-a BiH, te na osnovu uspjeha postignutog u konkursnoj proceduri i izlaganja programa rada, Vijeće je primjenjujući odredbe člana 61b. st. (8), (9) i (10) Poslovnika VSTV-a BiH, a nakon što kandidati na rang listi pod rednim brojem 1 i 2 nisu dobili potrebnu većinu glasova članova Vijeća, odlučilo da za posebnog zamjenika glavnog federalnog tužioca imenuje kandidata na rang listi pod rednim brojem 3 Hrvoja Čabrajića, koji od 21.01.2021. godine obavlja dužnost zamjenika glavnog tužioca Kantonalnog tužilaštva Kantona Sarajevo za Odjel privrednog kriminala i korupcije.

Prethodno imenovanju na dužnost zamjenika glavnog tužioca Kantonalnog tužilaštva Kantona Sarajevo, imenovani kandidat je u periodu od 01.05.2016. g. do 20.01.2021. g., u istom tužilaštvu obavljao tužilačke poslove na Odjelu za privredni kriminal i korupciju.

Vijeće je nakon ocjene stručnosti kandidata, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju tužioca, uzimajući u obzir, između ostalog, dosadašnje radno iskustvo kandidata, profesionalnu nepristranost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 25 bodova od mogućih 30 bodova, što ga je u konačnici rangiralo na trećem mjestu rang liste kandidata sa ukupno ostvarenih 125 bodova od mogućih 130 bodova.

Kriteriji stručnosti i sposobnosti pravne analize imenovanog kandidata, koji je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjen, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 5, 5 i 5, utvrđeno je da je kandidat za navedene tri godine za koje je ocijenjen ostvario prosjek od 5. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine koja iznosi 5 dodijeljen je ekvivalentan broj bodova koji se koristi u konkursnoj proceduri od 100 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristranosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodnih vještina i iskustva, te sposobnosti upravljanja ljudskim potencijalima utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54c., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 25 bodova.

Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (2) tačka c) Poslovnika VSTV-a BiH stekao uvjete za predlaganje i imenovanje na poziciju posebnog zamjenika glavnog federalnog tužioca, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Imajući u vidu potrebu za popunjavanjem pozicija u zakonom formiranom posebnom odjelu Federalnog tužilaštva Federacije BiH za rad na predmetima organizovanog kriminala i korupcije, koja je utvrđena u skladu sa članom 34. stav (1) tačka h), a u vezi člana 61b. stav (3) tačka b) Poslovnika VSTV-a BiH, Vijeće je prilikom imenovanja vodilo računa i o radnom iskustvu i rezultatima imenovanog kandidata na predmetima organizovanog kriminala i korupcije, te složenim krivičnim predmetima.

Radi utvrđivanja navedenih okolnosti, radnog iskustva i rezultata kandidata na predmetima organizovanog kriminala i korupcije, te složenim krivičnim predmetima, za kandidate su pribavljena mišljenja u skladu sa članom 59c. Poslovnika VSTV-a BiH. Navedene okolnosti su dodatno utvrđene na osnovu informacija pribavljenih na razgovoru sa kandidatom, u skladu sa članom 53. stav (11) Poslovnika VSTV-a BiH, te uvidom u službene evidencije Vijeća.

U mišljenju glavne tužiteljice Kantonalnog tužilaštva Kantona Sarajevo, navodi se da je Hrvoje Čabrajić, zamjenik glavnog tužioca navedenog tužilaštva, vršio (ili i dalje vrši) nadzor u većem broju predmeta privrednog kriminala i korupcije koji su od strane glavnog tužioca označeni kao značajni, što podrazumjeva pronalaženje adekvatnog rješenja u vezi eventualnih spornih pitanja koja su postupajući tužitelji imali u vezi s vrstom i načinom provođenja pojedinih istražni radnji, te u konačnici i pregled konačne tužilačke odluke u smislu njene ispravnosti i zakonitosti. Posebno je naglašeno da je od 2021. godine vršio pregled i davao upute u vezi optužnica koje su u nadležnosti Kantonalnog suda u Sarajevu. U posljednjih pet godina imao je ukupno šest osuđujućih presuda donesenim po optužnicama u predmetima organizovanog kriminala i korupcije. Tokom svog rada u svojstvu zamjenika glavnog tužioca, iskazao je nezavisnost, stručnost i samostalnost u radu. Posjeduje organizacione sposobnosti rada sa tužiteljima, policijom i istražiteljima, te posjeduje kvalitet u koordinaciji rada sa agencijama za provođenje zakona.

Glavni tužilac Federalnog tužilaštva Federacije BiH nakon pribavljenog stava kolegija tog tužilaštva u svom mišljenju je između ostalog naveo, da iz analizirana dva predmeta kojima je zadužen zamjenik glavne kantonalne tužiteljice Hrvoje Čabrajić, a koji su bili predmetom nadzora od strane ovog tužilaštva u smislu kontrole dostavljene optužnice odnosno nakon okončanja prvostepenog postupka i postupanja ovog tužilaštva u žalbenom postupku, koji je u toj fazi postupka uspješno okončan zbog kvalitetno izjavljene žalbe, može se zaključiti da je Hrvoje Čabrajić stekao potrebna stručna znanja i iskustva vezana za rad na predmetima visoke korupcije. U proteklom periodu imenovani je obavljajući svoju funkciju koja između ostalog podrazumjeva i kontrolu svih vrsta konačnih tužilačkih odluka stekao veliko iskustvo u rukovođenju Odjelom za privredni kriminalitet i korupciju.

Na osnovu navedenih mišljenja, informacija pribavljenih na razgovoru, te uvidom u službene evidencije Vijeća, zaključuje se da imenovani kandidat ima potrebna stručna znanja, iskustvo i rezultate na predmetima organizovanog kriminala i korupcije, te složenim krivičnim predmetima, uključujući i predmete visoke korupcije.

Imenovanje navedenog kandidata, u odnosu na ostala dva predložena kandidata, pored prethodno navedenih okolnosti, opredjelio je i detaljan Program rada za posebnog zamjenika glavnog federalnog tužioca Federalnog tužilaštva Federacije BiH za mandatni period koji je kandidat dostavio u toku konkursne procedure i izložio tokom obavljenog razgovora pred nadležnom komisijom Vijeća, kao i na sjednici Vijeća.

Nakon izlaganja programa rada i datih odgovora kandidata na postavljena pitanja pojedinih članova Vijeća u vezi sa izloženim programom rada, Vijeće je nakon sveobuhvatne rasprave konstatovalo da se u konkretnom slučaju radi o približno jednakim kandidatima sa uspješnom profesionalnom karijerom, koji

posjeduju radno iskustvo i rezultate na predmetima organizovanog kriminala i korupcije, te složenim krivičnim predmetima.

U takvim okolnostima, neposredan kontakt sa imenovanim kandidatom, kako pred nadležnom komisijom Vijeća za obavljanje razgovora tako i pred Vijećem kao cjelinom, pokazao je na strani imenovanog kandidata prednost u odnosu na druga dva kandidata koji su na rang listi ostvarili neznatno veći broj bodova.

Imenovani kandidat je kroz izlaganje programa rada pred Vijećem, za razliku od ostala dva kandidata, ostavio dojam da se radi o kandidatu od kojeg se, u konkretnom slučaju, u većoj mjeri može očekivati da će uspješno, stručno i savjesno obavljati dužnost posebnog zamjenika glavnog federalnog tužioca.

Osnov za takvu tvrdnju jeste, između ostalog, detaljno i uvjerljivo izlaganje prijedloga strateških ciljeva, ciljanih rezultata i predloženih mjera koje kandidat namjerava ostvariti u svrhu unapređenja rada institucije, odnosno Posebnog odjela Federalnog tužilaštva Federacije Bosne i Hercegovine za suzbijanje korupcije, organiziranog i međukantonalnog kriminala, zatim mogućih rizika koji bi mogli doprinijeti neostvarenju strateških ciljeva, te načina rukovođenja Posebnim odjelom.

Pored navedenog, Vijeće je cijeno da je imenovani kandidat stekao dovoljno relevantnog radnog iskustva u tužilaštvu na predmetima privrednog i organiziranog kriminala i korupcije, uključujući rukovodno iskustvo na Odjelu za privredni kriminal i korupciju Kantonalnog tužilaštva Kantona Sarajevo. Upravo određene dobre prakse rukovođenja iz dosadašnjeg rada imenovanog kandidata, primjenjive su za rad Posebnog odjela, što bi u konačnici trebalo rezultirati i dobrom saradnjom sa Glavnim tužiocem Federalnog tužilaštva Federacije BiH i ostalim kolegama tužiocima, kao i stručnim i tehničkim osobljem. U tom kontekstu, cijenjena je i činjenica da imenovani kandidat u svojstvu zamjenika glavnog tužioca Kantonalnog tužilaštva Kantona Sarajevo vrši pregled optužnica iz nadležnosti Kantonalnog suda u Sarajevu, te daje upute tužiocima u složenim, značajnim i timskim predmetima u kojima Ured glavnog tužioca vrši nadzor nad efikasnošću i zakonitošću rada tužioca.

Uzimajući u obzir navedeno, Vijeće je ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju tužioca i posebnog zamjenika glavnog federalnog tužioca za suzbijanje korupcije, organiziranog i međukantonalnog kriminala Federalnog tužilaštva Federacije Bosne i Hercegovine.

Ovim rješenjem, kandidat je istovremeno imenovan na poziciju tužioca navedenog tužilaštva, iz razloga što je na poziciju posebnog zamjenika glavnog federalnog tužioca imenovan sa pozicije tužioca drugog tužilaštva.

Prema odredbama člana 30. stav (1) i (2) Zakona o VSTV-u BiH tužiocima entitetskih tužilaštava se imenuju na mandat neograničenog trajanja, dok se zamjenici glavnog tužioca imenuju na mandat u trajanju od šest (6) godina i mogu biti ponovo imenovani, s tim što im mandat može prestati u slučaju da podnesu ostavku, navrše starosnu dob propisanu za obavezan odlazak u penziju ili budu razriješeni dužnosti iz razloga utvrđenih zakonom.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju imenovanog kandidata, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na dužnost, a provjera njihovih izvještaja o imovini i interesima bit će izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-417-1/2025
Datum: 16.01.2025. godine



